

TARIKH	11 NOVEMBER 2025 (SELASA)	SURATKHABAR	BH / UM / NST / TS / HM / KOSMO
TAJUK ARTIKEL	PELBAGAI LANGKAH PERKUKUH PERKHIDMATAN AWAM, KESIHATAN		
M/S	5 (NASIONAL)	KATA KUNCI	CIVIL SERVICE
BIDANG	CIVIL SERVICE		

Pelbagai langkah perkukuh perkhidmatan awam, kesihatan

Tawau: Kerajaan MADANI melaksanakan pelbagai langkah untuk memperkukuh sistem perkhidmatan awam dan kesihatan di negara ini, termasuk menyelesaikan isu doktor kontrak yang tertangguh sebelum ini, kata Datuk Seri Anwar Ibrahim.

Perdana Menteri berkata, hasil kerjasama di antara Kementerian Kesihatan (KKM) dan Jabatan Perkhidmatan Awam (JPA), hampir keseluruhan masalah doktor kontrak sudah berjaya diselesaikan.

Beliau berkata, kerajaan turut menaikkan elaun tugas atas panggilan pegawai perubatan sebanyak 40 peratus sebagai langkah awal penambahbaikan skim perkhidmatan sektor kesihatan itu.

Katanya, selain itu, kerajaan juga mengumumkan kenaikan gaji dua kali bagi penjawat awam iaitu pada Disember 2024 dan

Januari 2025, selepas 12 tahun tiada sebarang pelarasan gaji.

“Ramai tanya kenapa bagi banyak sangat kepada penjawat awam. Saya kata, dengar dulu. Sudah 12 tahun tiada kenaikan. Skim baharu ini lebih adil kerana jawatan peringkat rendah dapat kenaikan lebih tinggi berbanding pegawai kanan,” katanya.

Beliau berkata demikian ketika berucap pada Majlis Peluncuran Blok Baharu Hospital Tawau, di sini semalam. Yang turut hadir Menteri Kesihatan, Datuk Seri Dr Zulkefly Ahmad.

Blok bangunan baharu itu adalah projek di bawah Rolling Plan Rancangan Malaysia Ke-11 (RMK11) yang disempurnakan Kerajaan MADANI, sekali gus membuktikan komitmen kerajaan dalam menyiapkan projek tertangguh demi kesejahteraan rakyat

Menerusi pelaburan sebanyak RM223.65 juta yang dibiayai Kerajaan Persekutuan, blok baharu itu menambah 154 katil, menjadikan jumlah keseluruhan 585 katil rasmi di Hospital Tawau.

Perdana Menteri yang juga Menteri Kewangan, berkata untuk 2024 sahaja, kerajaan menanggung kos tambahan RM10 bilion bagi pelarasan gaji dan elaun, manakala tahun ini, peruntukan gaji penjawat awam meningkat kepada RM18 bilion sebagai pengiktirafan terhadap jasa mereka.

Pada masa sama, beliau berkata, Kerajaan Persekutuan menyalurkan peruntukan mencecah RM17 bilion kepada Sabah, meskipun hasil kutipan cukai dari negeri itu berjumlah kira-kira RM10 bilion setahun, sekali gus menepis dakwaan kerajaan mengambil hasil Sabah tanpa pulangan setimpal.

Perdana Menteri menegaskan, angka itu jelas menunjukkan komitmen tinggi Kerajaan MADANI dalam memperkasa pembangunan di negeri itu termasuk bidang kesihatan, infrastruktur dan kebajikan rakyat.

“Kerajaan ambil hasil RM10 bilion melalui sistem cukai, tapi bagi balik RM17 bilion kepada Sabah.

“Ini anak muda kena tahu, bukan nak lagakan orang Murut, Kadazan, Bugis, Suluk dan lain-lain, tapi untuk angkat martabat Sabah,” katanya.

Menyentuh isu Perjanjian Malaysia 1963 (MA63), Perdana Menteri menjelaskan kerajaan kini komited melaksanakan bayaran khas kepada Sabah dan Sarawak di bawah Perkara 122 Perlembagaan Persekutuan, hasil rundingan bersama pimpinan kedua-dua negeri.

“Sebelum ini Sabah dan Sa-

rawak hanya terima sekitar RM50 juta hingga RM150 juta setahun.

“Tapi selepas rundingan dalam jawatankuasa yang saya pengerusikan bersama Ketua Menteri Sabah, Datuk Seri Hajiji Noor dan Premier Sarawak, Datuk Seri Abang Johari Tun Openg, kita tambah kepada RM600 juta setahun sebagai bayaran khas sementara (interim),” katanya.

Justeru, Anwar menegaskan keperluan mengekalkan hubungan baik di antara kerajaan negeri dan Persekutuan, khususnya dalam memastikan kelancaran pelaksanaan dasar serta projek pembangunan.

“Sabah mempunyai potensi besar dan harapan tinggi terhadap kerajaan, tapi mesti diurus dengan baik dan mempunyai hubungan kerjasama erat dengan kerajaan Persekutuan,” katanya.